

四庫全書

集部

欽定四庫全書

集部

道園學古錄卷二十四

詳校官_{庶吉士}臣李如筠

侍讀臣孫球覆勘

總校官進士_臣朱鈐

校對官中書_臣王學海

謄錄監生_臣孫廷玉

欽定四庫全書

道園學古錄卷二十四

元 虞集 撰

碑銘

曹南王勲德碑

中書右丞相臣雅克特穆爾等言陛下入正大統道汴梁
命山東河北蒙古軍都萬戶府都萬戶伊蘓岱爾以其
兵從至京師以功拜河南等處行中書省平章政事於

法官一品當贈三代官封伊蘓岱爾曾大父博綽大父
伊爾根父阿委罕嘗為大將戰功多又皆死王事軍中
宜追封以第一等爵制曰可有司以詔書議贈所當得
官按地定封於是故贈定威佐運功臣榮祿大夫司徒
上柱國曹國公謚忠定博綽加贈定威佐運功臣光祿
大夫司徒上柱國追封曹南王謚如故故蒙古漢軍都
元帥贈宣忠靖遠功臣光祿大夫中書右丞相上柱國
曹國公伊爾根加贈宣忠靖遠佐運功臣金紫光祿大

夫中書右丞相上柱國追封曹南王仍謚桓毅故光祿
大夫中書左丞相贈協謀佐理功臣太師開府儀同三
司上柱國曹國公謚武定阿婁罕加贈竭誠宣力定遠
佐運功臣太師開府儀同三司上柱國追封曹南王改
謚忠宣曾祖母塔拜祖母默埒母托多庫克楞皆先封
曹國夫人改封曹南王夫人制下有勅國史臣集其以
曹南王世家行事歲月著文於其神道之碑臣集受詔
謹按博綽蒙古札拉爾台氏太祖皇帝初起朔方豪傑

之士雲起響應而從之為之腹心爪牙者必皆有深智
遠識有勇而善謀是以東征西伐無不如志以成萬世
之業者天為之生材而聖神善用之故也博綽自其幼
年已在宿衛為和爾齊和爾齊者服御弓矢常侍左右
者也又為博囉齊博囉齊者親烹飪以奉上飲食者也
蓋非篤慎強敏見知而親信任使者不得預是以屬車
所向無不在行數以徇戰掠地著功受賞太宗皇帝即
位仍以其職從征行隴北陝西之役攻城壁取郡縣率

先戰士竟死之伊爾根繼為和爾齊博囉齊膺其父之職也以太宗之命事伊勒吉太子為番衛之長歲乙未庫克楚胡土克圖太子出師伐金遂侵宋有旨出從戰戰有功拜萬戶方是時察罕以太祖所拔重臣為大將位望崇甚而伊爾根以天下馬步禁軍都元帥為察罕之副總領諸翼蒙古漢軍馬統領屯戍大軍南面之征最為重兵矣於是取陝西掠河東踐河南歲乙卯擣光壽大帥察罕歿憲宗皇帝命伊爾根代之拜諸翼軍馬都元

帥統大軍攻淮東西諸城歲戊午帥師至揚州數出戰
遂以戰死阿婁罕以諸翼蒙古軍馬都元帥統其父之
軍從世祖皇帝南伐宋憲宗崩世祖北還即皇帝位從
至伊埒巴延布拉克之地額森布格阿勒達爾琿塔罕興
兵為亂不受詔命討之阿婁罕以其所部蒙古軍擊之
北至實默圖之地遂追之至河西功成而還中統建元
之歲賞功賜黃金五十兩達爾丹衣九襲達爾丹者西
域織文之最貴者也二年濟南帥李壇以山東反大發

兵討之阿婁罕總其衆次老倉口以進戰明年濟南破
壇誅山東平師還又明年賞功賜黃金虎符一銀印一
弓一矢百弓矢之服黃金飾其具馬鞍轡一黃金塗銀
飾其具以舊官將其軍至元初大軍伐宋五年師圍襄
樊力戰數有功論賞賜白金五十兩金織文衣九襲十
一年取宋大軍渡江阿婁罕以其師取鄂州沂江陵下
至荊口所至郡縣降其軍慰撫其民人明年拜昭毅大
將軍統其師發建康道漂水漂陽指獨松關抵杭州上

方道與宋將吳某等戰斬之斬首七千級又與宋將祝亮戰擒亮并其裨校七十二人斬首三千餘級又與宋兵戰斬首七千餘級又斬逐其援兵退走數十里宋將奉使吳某都統丁某總制趙某來逆戰敗之斬首三千級擒總制谷某又擒宋將張八其裨校斬首二千級六月即軍中拜中奉大夫行中書省參知政事是年宋亡明年巴延丞相以宋主入覲九月阿婁罕帥師東渡浙取越明溫台衢婺處及閩中諸郡追宋宗室秀王某道

數戰皆敗之降其運使趙某提刑趙某五百餘人至福州與宋軍轉戰四十餘里斬步帥觀察使李世達等於陣殲其軍獲秀王及其家屬將吏百八十餘人降其部曲淮卒三千人於是江南悉平十二月有詔以中奉大夫中書參知政事授金虎符行江東宣慰使郡縣新附民心未安威信未字莫不悅服十四年入覲上嘉其功慰勞甚厚進拜資善大夫中書左丞仍還宣慰江東十六年六月進拜資德大夫中書右丞仍留宣慰江東十

八年入覲方是時海內悉已平定舟車所至莫不服從而日本叢爾海島之間彌固自保有司以致討為言天子從之廼賜玉帶一金鞍一弓一矢百弓矢之服具命為中書左丞相行省事統蒙古諸翼軍馬四十餘萬往征之師次明州且渡海矣歿焉既歿而子伊蘓岱爾幼拜姓伊蘓岱爾之兄也襲世職為萬戶總其軍後以功僉書江淮行樞密院事進拜江浙行省右丞福建行省右丞河南行省平章政事仍領其先世萬戶軍馬既歿

伊蘓岱爾以元貞元年世其職授昭勇大將軍左手蒙古軍萬戶佩金虎符武宗皇帝在位思勲舊將帥之家求其子孫之有功有能者故于伊蘓岱爾有加賚焉命玉工刻白玉為伊蘓岱爾所署字使以畫文書發號令於所部使知其為上所尊信者皇慶改元賜白銀五十兩金織文衣二襲延祐三年覃恩加昭毅大將軍至治改元賜白金五十兩金織文衣二襲泰定三年進昭武大將軍皆以萬戶總其軍如故後二年今上皇帝南還

京師將有大正于天下道過汴梁今太保巴延公方鎮汴省八月庚子召伊蘓岱爾帥其兵以行乙巳兵大集士卒感激赴義車馬器械精備勇氣自倍丁未命為本省參知政事賜黃金五十兩玉帶一鑲鐵鐐刀一師行庚戌進為本省平章政事仍兼山東河北蒙古軍都萬戶府都萬戶賜銀印一金三珠虎符一黃金五十兩白金倍之玉帶一海東青鶻一至真定賜名馬二至新樂驛賜黃金五十兩甲一襲至慶都賜礪礪盤杆一綉青

絨袍一九月庚申為同知樞密院事仍兼都萬戶賜寶
飾鑲鐵槌一鑲鐵寶刀一壬申皇帝即位大明殿建元
天曆明日拜知樞密院事授以樞密院印仍領其萬戶
事甲戌圖們岱爾自遼東引兵寇通州賜寶劍弓矢鞍
轡令伊蘓岱爾帥諸翼軍馬出禦之丙子王禪等之兵
軍於北皇后店伊蘓岱爾移兵合擊敗之己卯哈喇齊
呼圖克特穆爾阿婁特穆爾之兵軍于昌平縣東白浮村
帥師合擊敗之壬午錫保齊大都之兵軍于昌平縣東

北又帥師合擊敗之凡來寇之兵悉已敗歟總兵者或
執或敗走北面悉平癸未太師右丞相會諸將於龍虎
臺下奏凱於朝有勅命伊蘓岱爾守居庸之北闕壘石
以為固十月己亥拜榮祿大夫知樞密院事依前兼管
都府事統領諸翼蒙古軍馬使出師禦寇兵之西入者
師次廣平磁州之武安縣敗獲總兵者額森特穆爾等
而西南諸郡以次告平庚子召還辛丑賜白金五十兩
中統鈔五千貫金織文衣二襲十一月丁亥樞密院奉

勅散諸軍行院官還京師明年二月以舊官復拜山東
河北蒙古軍都萬戶府都萬戶三月賜以濟蕪宴服濟
蕪者貴臣見饗于天子則服之今所賜絳衣也貫大珠
以飾其肩背膺間首服亦如之副以納鵲斯衣等七襲
納鵲斯者縷皮傳金為織文者也海東青鶻二五月上
之上都伊蕪岱爾仍帥其所統兵從八月賜白金五十
兩金織文衣一襲十月癸卯皇帝若曰伊蕪岱爾屬橐
鞬以備干城恪恭職事朕用嘉之其以為河南行中書

省平章政事代奇珠移奇珠他鎮十一月丙寅以所統
兵置大都督府命兼山東河北蒙古軍大都督秩從二
品刻銀印賜之已已有封贈之命嗚呼上之所以待功
臣將帥寵錫榮耀不亦盛乎臣嘗聞之自昔國家所貴
有勲舊之臣者以其君臣之契深宗社之事諗逆順向
背之道素定于見聞而愛敬之誠自有不能已者故其
得備戎行氣決志憤以能成功也世祖皇帝既定海內
以蒙古一軍留鎮河上與民雜耕橫亘中原故將委忠

信於國人備非常於他日其所以為子孫計者深且遠
矣今上皇帝以天縱之資歷造昧之久奮名義以致討
風逆應天人而歸履大位固歷數之所在也若曹南王
家自開基以來已入備禁衛出死行陣者三世矣今平
章以其世守之舊兵奉中興之大業以致真王之封食
所居之邑聲振大藩受軍民之寄福祿方未艾也嗚呼
偉哉敢再拜稽首而為之銘詩曰

昔在太祖受命自天聖子神孫師武用宣世祖赫赫一是萬

國帝臣孔多貴有世績忠定之興承國肇基迺執干戈迺奉
鼎彝不寧方來先後奔走盡瘁殞身以昌厥後有竭桓毅益
信以崇帝討王誅無往不從金氣既衰宋亦就蹙兼弱攻昧
我帥我督截彼淮浦其流湯湯蹠血以終厲我國殤克
繼父祖忠宣之武天錫之功世皇是輔肅肅南征絕江
禱城左纛振旅馳追不庭世皇御天於鑠如日式圍不
遺聲教迺訖于時出師有專有分江漢之間忠宣所軍
蒙衝載兵遡江薄海列郡風靡有順無悔旋指江東進

師合攻闕柵兒嬉孰當吾鋒斬將連營覆卒盈野廼會
元戎于城之下變變孱羸解璽入朝掠其餘疆曾不崇
朝既定甌越成功來告命以相臣持節東道治以歲成
位以序升入覲天子龍光是承天子曰嘻蠢彼海裔爾
相于佐帥士以濟臨涯揚舲海若弭靈天不憖遺亟殞
將星忠宣所統國人之勇留戍羅絡齊魯梁宋鼓旗間
間武帳在中既世其官又世其功今我聖皇中興以正
錫鑾在塗萬騎前來誰其將之不二之臣彼壘于郊摧

之為塵聖皇賞功寶玉鷹馬還長其鎮為國名虎額額
爾軍何以表之爾建大府都督之旗爾家于曹有桑有
土昔公今王三世之祐豐碑烈功備書三王咨爾多士
勸忠勿忘

高昌王世勲之碑

至順二年九月某日某甲子皇帝若曰予有世臣特穆
爾布哈自其先舉全國以歸我太祖皇帝實贊興運勲
在盟府名著屬籍世績令德以勸相我國家至特穆爾

布哈佐朕理天下為丞相為御史大夫文武忠孝厥績
懋焉昔其父墓永昌大夫往上塚其伐石樹碑而命國
史著文而刻焉臣某頓首受詔退而考諸高昌王世家
蓋輝和爾之地有和林山二水出焉曰圖固勒以蘓嚕
克一夕有天光降于樹在兩河之間國人即而候之樹
生癭若人姪身然自是光恒見者越九月又十日而癭
裂得嬰兒五收養之其最穉者曰布克罕既壯遂能
有民人土田而為之君長傳三十餘君是為伊嚕勒德濟

數與唐人相攻戰久之乃議和親以息民而罷兵於是唐以金蓮公主妻德濟之子格爾德濟居和林伯哩伯哩特言婦所居山也又有山曰騰格哩哈達言天靈山也南有石山曰呼圖哩哈達言福山也唐使與相地者至其國曰和林之盛強以有此山盡壞其山以弱之乃告諸德濟曰既為婚媾將有求於爾其與之乎福山之石於上國無所用而唐人願見遂與之石大不能動唐人使烈而焚之沃以醇酢碎石而輦去國中鳥獸為之

悲號後七日伊嚕勒德濟薨自是國多災異民弗安居傳
位者數亡乃遷居交州今和卓也統伯實巴哩之地北至
阿珠河南接酒泉東至鄂端哈實哈西臨西蕃凡居是者
百七十餘載而我太祖皇帝龍飛於朔漠當是時巴特瑪
阿勒坦德濟伊克都護在位伊克都護者其國王號也知
天命之有歸舉國入朝太祖嘉之妻以公主曰伊埒阿敦
待以子道列諸第五與哲伯諾延征哈瑪爾蘇爾坦回回
等國將部曲萬人以先啟行紀律嚴明所向克捷又從太

祖征尼沙布爾征河西皆有大功薨次子伊魯格勒齊德濟嗣為伊克都護伊魯格勒齊德濟薨子茂瑪勒德濟嗣為伊克都護將特摩齊軍萬人從憲宗皇帝伐宋合州攻釣魚山有功還軍和卓薨至元三年世祖皇帝命其子和齊格爾德濟嗣為伊克都護海都特們德爾之亂輝和爾之民遭難解散於是有旨命伊克都護收而撫之其民人在宗王近戚之境者悉遣還其部始克安輯十二年都勒幹布斯必等率兵十二萬圍和卓揚言曰阿

濟克鄂囉齊諸王以三十萬之衆猶不能抗我而自潰
爾敢以孤城嬰吾鋒乎伊克都護曰吾聞忠臣不事二王
且吾生以此城為家死以此城為墓終不能爾從城受
圍六月不解都勒幹系矢以書射城中曰我亦太祖皇帝
諸孫何以不歸我且爾祖尚主矣爾能以女歸我我則
休兵不能則亟攻爾其民相與言曰城中食且盡力已
困都勒幹攻不止則淪胥而亡伊克都護曰吾豈惜一女而
不以救民命乎然吾終不能與之相面也以其女伊埒

伊克默色必吉厚載以茵引繩墜諸城下而與之都勒幹解去其後入朝上嘉其功錫以重賞妻以公主曰巴克巴噶爾定宗皇帝之女也又賜寶鈔十二萬定以賑其民還鎮和卓屯於南哈密勒之地兵力尚寡北方軍猝至大戰力盡遂死之子努爾德濟方幼詣闕請兵北征以復父讎上壯其志賜金幣鉅萬妻以公主曰布爾罕太宗皇帝之孫女伊珠薨又尚其妹曰本布徹爾公主有旨師出河西俟與北征大軍齊發遂留永昌焉會吐蕃托

沙瑪作亂詔以榮祿大夫平章政事領本部特摩齊等
軍萬人鎮吐蕃宣慰司威德明信賊用斂迹其民以安武
宗皇帝召還嗣為伊克都護賜之金印復署其部押西護
司之官仁宗皇帝始稽故實封為高昌王別以金印賜
之設王傳之官其玉印行諸內郡伊克都護之印則行諸
輝和爾之境本布徹爾公主薨尚主曰烏爾戩阿南達
安西王之女也領兵和卓復立輝和爾城池延祐五年
十一月廿一日薨子二人長曰特穆爾布哈次曰恰克嘉

皆本布徹爾公主出也特穆爾布哈大德中尚公主曰多爾濟斯滿庫騰太子孫女也至大中從父入備宿衛又事皇太后於東朝拜中奉大夫大都護陞資善大夫又以資善出為鞏昌等處都總帥達嚕噶齊奔父喪於永昌請以王爵讓其叔父奇徹台不允嗣為伊克都護高昌王至治中與納木達實王同領甘肅諸軍且治其部泰定中召還與科綽布哈威順王瑪努勒宣靖王庫克布哈靖安王分鎮襄陽尋拜開府儀同三司湖廣行省平章政事

今上皇帝歸正大統召之至汴以左丞相留鎮湖廣時
左轄相媚而害政人所弗堪至是有旨執而僇之乃更
為申救於上曰是誠有罪然不至死再三言之得釋其
不念舊惡以德量贖褫類如此天厯元年十月拜開府
儀同三司上柱國錄軍國重事知樞密院事明年正月
以舊官勲封拜中書左丞相三月加太子詹事十月拜
御史大夫大夫之拜左相也追念先生之遺意讓其弟
恰克嘉嗣為伊克都護高昌王臣惟高昌祖之所自出事甚

神異其子孫相傳數十代至于今克治其土豈偶然哉
和濟格爾德濟百戰以從王事捐骨肉以救其民後卒
死之其節義卓然如此至其子與孫再世三王盛德之
報也大夫世胄貴王清慎自持戶庭之間動中禮法平
易以近民正己以肅物仁義之功沛如也及其臨大政
決大議憂深思遠而聲容凝重若泰山然用能彌綸大
經以佐成雍熙之盛所謂社稷之臣也哉表其碑曰世
勲為宜敢再拜系以詩曰

維皇太祖建極定邦知幾先徠偉茲高昌列國率賦寶玉重
器稽首受命以表誠至太祖曰嘻天啓爾衷有附匪疏以究
爾功橐鞬介冑十千維旅以從四征斥廣疆宇從我王事
靡鮮朝夕邦之世臣食其舊邑舊邑高敞介乎強藩為暴突
來虔劉以殘保障扞城我禦我備敵為弗順我死無貳宗墉
言言寇來實繁力殫守堅責我師昏有齊季女出女紓難義
有絕愛皇用咨嘆寇退民完天子慨之輦帛載金悴斯
漑之城郭室家既還既復庶其寧我皇錫之福于廬于

處狂嚚摘之矢盡衆殲執節死之維時賢嗣泣血入告
請揚天威以報無道天子壯之俾軍于西撫爾民人授
之鼓鼙有嚚西羌弗靖以撓移節征治旋就馴擾武皇
纘武睠爾舊服節旄印綬仍護其屬乃稽王封在時仁
宗旂纛舒舒刻章以庸廼即永昌幕府斯建將星宵隕
亦既即遠宰木陰陰閱歷歲時顧瞻徘徊邦人之思大
夫嗣德克敬以讓三命彌恭世爵用享珮玉瓊琚靖共
以居躬行孝嚴服御不渝肅肅雖有察有容親親尊

尊允德允功天子還歸大義攸正大夫在行民信以定
既安既寧治久告成大夫司憲百度孔明袞裳赤舄進
見退思敬于無虞匪泰伊暢大夫申申明哲以孚噓歆
有懷永昌之墟天子有詔大夫省墓勒文載碑世勲是
祚維王孫子永言思之豈惟子孫百辟其儀之

大崇禧寺碑

昔在我世祖皇帝膺上天之景命承太祖之丕基混一
海宇建立制度條理綱紀一出睿思以為子孫萬世之

成法者昭乎若天旋而日行也乃若崇尚佛教營治塔寺亦必弘偉殊勝足以聳神明之瞻者歷數在躬天之所命孰能違之若夫大雄妙覺之尊以其慈威定慧默相潜佑者必有其徵矣是以累聖相承率是而行之也今上皇帝潜邨在金陵時於其暇日登鍾山而觀之見其江山之縈迴樹藝之廣茂民庶之熙洽慨然興嘆以爲我祖宗德澤之涵煦以至于斯也問諸邦人父老則又以爲昔有聖僧曰寶公者自梁以來委靈茲山能相

我國家之神化以覆護吾民也水旱疾疫凡有禱焉隨
願輒應於是皇上感焉鍾山之陰有石巖中虛下出流
泉注入功德水乃即巖中作觀音大士象巖前構木棧
虛容瞻禮者既而又以為未足即翫珠峯之北得高爽
之福地規置大剎宮殿樓閣如自天降寶公之塔在峯
上正當其前來茲山者仰而望之如見天宮于林壑之
表然後聖上仁民愛物之心所以屬諸寶公者衆庶莫
不知之相與踴躍而贊歎矣鍾山之舊寺聚銅數萬斤

鑄大鐘金既在銘皇上以碧珠投之及鐘成珠不壞完好堅固宛在鑲銑萬目驚視以為寶公之報貺焉天厯元年九月某日臣某入見內殿親詔之曰宜加寶公號曰道林真覺慧感慈應普濟寺曰大崇禧寺汝某其勒文以記之臣某既具述其事而竊思之曰帝王之興也天與之天保之百靈受職符瑞交現此其常也金陵據東南之會山川鬼神翼扶翕張於吾君者蓋凡五年而後歸正大統皇心之注於斯乎嗚呼累朝佛宇之盛皆

臨御時為民禱崇資用功力有司具焉今崇禧之成實
在試難之日出私財以具事而雄麗若此此固生民之
所以深感乎淵衷而寶公之所以顯著於祥符者也嗚
呼休哉敢再拜稽首而獻銘曰

大江之南鍾山龍盤王氣潛鬱神所保完於皇聖明遵養時
晦靈示奉天竦立以待春殷秋高來遊來遨旂有交龍載雲
在郊顧瞻原隰有稼有穡元元之生聖聖之澤民亦望之帝子
寶來不鄙我邦庶無苦哉維梁寶公去之千歲善福其民有

引弗替皇運勃興寶有慧知奔走先後克相厥時奕奕
祠宮我營我作我報無私爾感無忤吉金之良燥濕不
移萬石在簾闕

寶乃發祥以肅羣眎明珠不灼
彰上之賜飛龍在天臨制九圍皇心徘徊眷茲崇禧崇
禧之宇永殿南服天子萬年錫我民福

集慶路重建太平興國禪寺碑

昔金陵有神僧曰寶誌宋元嘉中居道林寺歷齊至梁
數著靈異天監十三年示寂武帝感其遺言瘞諸鍾山

獨龍之阜帝女永安公主表以浮屠因建寺曰開善至
宋太平興國中太宗得誌公秘識石中符其國運有神
降其宮親與之語蓋誌公云太宗異之號寶公曰道林
真覺菩薩更名寺曰太平興國賜田以食其人熙寧中
王丞相安石守金陵合諸小刹以附益之寺始大建炎
燬於兵紹興中更作淳熙中又燬隨更作之每更作輒
加宏廣日葺月累至於我國朝而規制之盛極矣至治
辛酉匡廬僧守忠應請來主之禪學之士來者日滿其

室今上皇帝以泰定乙丑之歲正月來至於是邦而寺適災天意若曰其撤舊而作新之乎皇上感焉出金幣以爲民先是行御史臺與郡縣之吏皆祇若上意始忠之治寺也時有蒲蘆之澤前見奪於豪衆寺隸訟之累年弗決忠至讓而弗辨奪者愧而歸之人固以是信道之矣皇上一風動之遠邇雲集富者効其財貧者輸其力工則致其巧農則獻其食一歲垣廡成再歲堂室具其可以名書者曰方丈曰北山閣曰經樓曰香積曰

水陸堂曰白蓮堂曰伽藍堂曰大僧堂曰道林堂曰新
倉院曰耆宿之舍而大佛殿鍾樓三門未成蓋有待也
歲在戊辰鑄大鐘為金數萬斤方在冶上施寶珠投液
中鐘成其款有曰皇帝萬歲珠宛然在其上若故識之
而光彩明發不以灼毀萬目共覩歡歎如一時上方別
建佛祠於寺北今賜名曰大崇禧萬壽寺者也是年秋
皇帝歸膺大寶是為天歷元年出詔書布德澤於天下
即命廷臣製寶公號曰道林真覺惠感慈應普濟聖師

封名曰以禮祠之出黃金白金重幣以賜忠俾成寺之役蠲寺田之賦賜守忠為佛海普印曇芳禪師住持大崇禧萬壽寺兼領茲寺未幾加授太中大夫以大禪寺領兩寺如故至順元年秋御史中丞趙世安傳勅召忠入朝九月九日上御奎章閣三藏國師吏部尚書王某以守忠入見奏對稱旨命大禧宗禪院日給廩餼賜金襴伽黎衣與青鼠之裘其弟子以教紹基等凡九人賜各有差十二月一日賜設於聖恩寺乃詔學士臣某至

榻前製文以記之俾忠歸刻諸石國師以其事示臣某
如此臣謹具載而言曰上於金陵新作之事二曰龍翔
集慶因潛龍之舊邸也曰崇禧萬壽廣親構之新祠也
獨太平興國雖曰宋齊梁陳唐宋之遺然盡燬而復興
實在今上龍飛之日景運之玄契蓋有徵焉茲三寺者
鼎立乎一郡之間以同贊乎聖天子億萬斯年之壽豈
不盛哉然臣嘗竊聞陛下之意每不欲專福于躬而欲
溥濟均惠於天下故敢述萬一而銘之銘曰

維帝受命厥有祥符天人合機不占以孚於赫聖皇聖武之
系贊于克艱神作司契皇有萬方山川幅員釐厥下土徒御
告勤顧瞻道林在江之汜翠蓋孔旌來狩來止道林有
宮百靈攸宗中有神師民所敬恭土良泉甘風雨時若
發祥效珍以待聖作聖作孔時動而天隨龍躍以飛神
師啓之神師不言而示以兆有命方新去故以燎作而
新之自我聖皇乃祓乃除乃基乃堂日月重明天光旁
燭皇心載欣萬佛降福凡我臣民息養以生飽歌煖嬉

稚壯耄寧裹兵以革牛馬在野至於永久樂其休暇
動孳殖亦遂以成幽塞苦窵各啗而亨聖皇之心斯佛
之力銘以著之以示無極

道園學古錄卷二十四

欽定四庫全書

道園學古錄卷二十五

元 虞集 撰

碑

大龍翔集慶寺碑

欽天統聖至德誠功大文孝皇帝自金陵入正大統建
元天歷以金陵為集慶寺使傳旨行御史臺大夫阿爾
斯蘭哈雅命以潛龍之舊作龍翔集慶寺云明年召中天

竺住持禪師大訢於杭州授大中大夫主寺事設官隸之畫官為圖授吏部尚書王僧嘉努住董其役斥廣其地為民居者悉出金購之土木瓦石丹堊金碧之需財自內出不涉經費工以傭給役弗違農有司率職庀工景從響應御史中丞趙世安承稟於內行御史中丞伊實棟阿固達哈雅相繼率其屬以莅之吏敏於事民若不知材既具期以明年正月甲子之吉廼建立焉其大殿曰大覺之殿後殿曰無量壽佛之殿居僧以致道者

曰禪宗海會居其師以尊道者曰傳法正宗之堂師弟子之警發辨証者曰雷音之堂法寶之儲曰龍藏治食之處曰香積鼓鐘之宣金穀之委各有其所繚以垣廡闢以三門而佛菩薩天人之象設纓牀蓋座嚴飾之具華燈香樂之奉與凡所宜有者精備以稱上意焉賜姑蘇腴田以飯其衆上在奎章閣親詔臣某製文勒石以誌之臣聞金陵之墟自秦時望氣者嘗言有天子氣至藏金土中以填之其後若吳晉宋齊梁陳南唐之君長

據以為都會然皆瓜裂之餘僅克自保不足以當王氣之盛夫孰知江山盤踞之固天地藏閤之久積千餘年而有待於我聖天子之興也不然何淵潛之來處遂飛躍之自茲見諸禎祥行事昭著之若此者乎夫太陽之升麗於天光耀熙赫高深廣袤之區生成動植之類孰不受其煦燠而其次舍之所經知天者必仰推而志之天子以四海為家莫非聖明之所臨鑒惟帝運之所由起天人應合之機實在於此其可忽諸今天子建極於

中撫制萬國顧懷昔居勢隆望重非我佛世尊無量之
福孰足以處乎此也茲寺之成上以承祖宗之洪庥下
以廣民庶之嘉惠聖天子之至仁大慈垂示乎億萬斯
年者於此可見矣嗚呼盛哉敢拜手稽首而述讚曰

明明上天祚我皇國聖祖神宗立我民極於昭武皇懋建
丕績憲章修明民用齊飭天下為公仁廟受策治極而
圯或斲彛則乃睠明哲是保是翼俾久而安弗遐以邇
祝融効靈海若率職更相吉土此維與宅吉土維何建

業舊邑龍依崇丘虎立磐石昔有居者不稱厥德惟我
聖皇天命攸迪川寧於波田宜於穡民用孝敬神介景
福帝命不遲師武臣力遂開明堂受天之歷廟而祖饗
郊而神格治功告成庶物蕃息江流浪浪經我南服中
城有宮皇所肇迹惟時父老載慕疇昔雲來日臨庶我
心懌皇帝曰嘻予豈汝釋維大覺尊寶相金色常以惠
慈拯汝迷溺我即我宮作祠奕奕照汝淨月沐汝甘澤
汝見大雄如我來即馬寶象寶貝金珠壁凡為汝故我

施毋惜無留無害居佛之域民庶稽首我不知識我願
天子聖壽萬億與佛同體住世有赫一誠報恩有永無
數

大承天護聖寺碑

惟皇上帝監觀萬方爰啓聖神俾一遐邇時惟太祖皇
帝神武維揚作興帝業世有濬哲秉鉞誓征粵世祖皇
帝建茲民極用輯大成既有九有戢兵包甲禮修樂宣
神祇咸若敦一本以端統樹羣支以定分秩序有經萬

世永賴成宗顯承法令較一我武考受命撫軍歸續歷
服保育民物既庶既富豐亨豫大如日方中迨至延祐
至治之間重熙累洽物大而盛弗虞儉王間數彞憲於
是欽天統聖至德誠功大文孝皇帝德合天人之助躬
修揖遜之節武以勘定文以宣昭忠孝率職姦慝擿伏
雨暘以時年穀順成寶興於山海波不揚嘉靖寧一利
澤長久頌聲交作度越古今列聖之仁恩神靈之景貺
布濩旁達湛漬駢臻於斯時也有歛福錫民之志焉固

皇極之道也乃託諸制作之宏祠享之盛於以表奉先之孝於以廣濟物之慈同仁之化不亦與天地合德矣乎天歷二年歲在己巳春月皇帝若曰予承宗廟之重君臨天下夙夜兢懼思所以上繼祖宗下安民庶者不敢少置也矧予昔在冲幼太皇太后躬保持而導迪之欲報之德亦不敢少忘也稽諸佛氏之書孝莫重於報親慈莫廣於及物而吾佛之所以陰相我國家者豈可量哉汝太禧宗禋使伊呼布哈中書平章明埒棟阿大

都留守張錦結努其為朕度地以作梵剎稱朕心焉四
月上幸近郊觀於玉泉之陽謂侍臣曰曾岡複巘隱隆
西北太湖之浸汪洋涵峙而東高甕山在焉旁薄扶
輿固祇園之地也使太史眎之曰吉秋八月晦立隆祥
總管府以領之鑄銀為印秩正三品以臣伊呀布哈領
府事將作臣額穆爾蘇為達嚕噶齊國語達嚕噶齊官屬
之長也臣錦結努為總管上曰建寺而不先正其名民
將因其地而稱之其署題曰大承天護聖寺又曰寺所

以嚴奉祀事而屢氓雜居則幾乎瀆矣買旁近地得十頃有奇皆厚直以予之分賜從臣俾為休沐之邸侍祠而至則處焉且命其總管府臣相大田以買之度其歲入以為僧食明年上受尊號改元至順十月上命太師臣雅克特穆爾率百官詣寺所告諸后土之神始命大匠治木乃命中書右丞臣薩迪為隆祥總管府達魯噶齊蓋以省臣重其事也二年四月十六日始作土功治佛殿基得古金銅之器於地中多事佛之儀物實有密契

者云寺之前殿寘釋迦然燈彌勒文殊金剛并二大士之像後殿寘五智如來之像西殿度金書大藏經皇后之所施也東殿度墨書大藏經歲庚午上所施也又像護法神王於西室護世天王於東室二閣在水中坻東曰圓通有觀音大士像西曰壽仁上所御也曰神御殿奉太皇太后晬容於中日有獻月有薦時有享器用金寶曰壽禧殿上齋宮也諸宿衛之舍畢具九月上諭臣錦結努曰朕之建寺非徼福以私朕躬也昔者國家有

佛祠之建金帛穀粟一出於國之經費受役庀徒則民與民官府供億並緣為奸非朕意也今茲役也工傭其直物償其價勿使有司因得以重困吾民臣錦結努頽首受詔而退鳩王以集事材木甍瓦丹漆設色必精必良其土宜交易得所稱事出傭藝各奏能施無遺巧人樂效力若子趨父屬樞密儲政兩院臣請以所領軍就役而給錢如民則軍上亦被惠矣從之凡役軍四千三百人留守臣言寺有行宮天子之所齋也嚴重不敢褻

請以所領匠將作而給錢如兩院之兵亦從之十月十五日
上覽而悅之陞隆祥總管府為隆祥使司秩從二品命太禧宗禋使臣鴻和爾布哈臣薩迪臣額穆爾蘇大
司農臣錦結努為之使他官與次俱升又作東別殿柵
木別殿丈室講堂衆沙門之居會食之所碑亭井亭庖
湍庫廐門垣橋梁咸稱觀美凡規制皆圖以獻而上親
臨定焉皇后出大慶禮賜白金從戶部易鈔四萬定及
割田賦之在荆襄者以資之三年寺大成於是召五臺

山萬聖寺釋師惠印特賜榮祿大夫司徒主教於寺有勅命臣祖常臣集臣法洪臣惠印製文以刻諸碑臣等既同奉詔乃相與言曰惟昔有國家者秘祝不私其身而思錫諸民史臣書之後世誦之今聖皇之心一出仁孝瑣瑣之秘祝詎可擬倫哉且其為役可謂大矣財出內帑而不傷於外府役以傭錢而不勞於兵農官有專任而不煩於有司欽惟聖上怡神穆清對時育物量準天地而一日萬幾睿知明達而慮周天下至若斯寺之

落成也營度經始之勤治辨董正之任考圖攻位之審
其簡在帝心又有如此者豈非億萬世宗社生靈之福
哉敢再拜稽首而獻文曰

於赫皇祖聖神立極歷世繼承照臨維繹維我聖皇孝思如
在視民如傷博施廣愛具曰大雄等慈能仁導善閑惡以救
我人乃作大剎於國西郊檐屋翬翼霧雨之交金玉寶物美
同河沙曰予有祈世不謂多飛蓋樹幢香鬘珠網聖靈與俱
來即來享福我惠我遂我煦養子孫黎民均視同仰思我太母

為世遠思顧復之勤孫謀是貽肅肅徽音邈邈令儀眷
予晤懷庶其來茲相彼流泉閣於水溪人神翊扶天子
至止鼓鐘鼎彝嘉樂宴喜多壽多福又多男子羣臣百
工侃侃獻功民無勦勞府乃羨充樂石刻辭頌言雖雖
億萬斯年贊於皇風

河圖仙壇之碑

今上皇帝以特進上卿吳公全節年七十用其師故開
府儀同三司神德張真君故事命肖其像使宰執贊之

識以明仁殿寶而寵之賜宴於所居崇真萬壽宮近臣
百官咸與大合樂以饗盡日迺已既拜賜公坐於承慶
之堂召門人弟子而告之曰吾在髫髻志翔寥廓稍長
學道弱冠從先師謁世祖皇帝遂留不歸五十年間以
天子之命祀名山大川東南西北轍迹咸至一遇泉石
之勝輒旁皇而不可得而我父母被寵光封鄉國高年
偕老時優詔使歸為壽而我曾不能晨夕在側吾終身
之不安者也今老矣為我圖地必吾父母之塋是近庶

體魄有所依焉則我之志也小子識之於是命弟子歸
饒而求之明年得地於安仁縣去饒國公之墓左數百
步其山曰河圖之山書以圖來公歎曰吾昔聞諸異人
云河圖八卦也今人所傳河圖蓋五位相得而各有合
之圖也儒家頗駭其說然即卦以指視先天位數吾得
金吾之旨焉故宋江東謝公枋得得其說而隱去世祖
力致之在道不食數十日而神氣益完迺授以官迺化
去吾受其書而藏之今得山曰河圖告我之兆久矣迺

命作石壇據風氣之會將以栖神焉則又歎曰予平生以泯然無聞為深恥每於國家政令之得失人才之當否生民之利害吉凶之先徵苟有可言者未嘗敢以外臣自詭而不盡心焉而恩賚之厚際遇之久則有非人力所能至者矣其從子集賢待制善竊知公之意錄其平生之事畧已成編會善卒公得其書而感焉乃遺書江南以告集曰吾蚤歲猶得見國朝諸大臣及宋之遺老逮其中年公卿之重士大夫之賢且仁者無一人吾

不見焉覽觀四方逝者如水知心之友其文可以傳者
莫若清河元復初氏而云亡亦已久矣區區之迹他日
將何所托乎人生不可期相望數千里子必為我著仙
壇之記使千載之下猶或於此乎知之則亦故人之情
也夫迺為次第善之所錄以遺之云吳氏系出太伯為
吳子之國子孫散處吳楚間多以國為氏其在番者為
番君番之吳皆宗番君矣其居安仁有龍坡居士諱岳
者墓在桂溪前倉之曾源其高大父也世居壽櫟山屋

於礮石之上故宋咸淳己巳有泉出東楹之礎潤液之
脉理直如貫繩上升梁間達乎西楹迺生靈芝光彩映
日久而不壞是歲十一月七日公生丹光盈室生七月
而能言其父抱膝上因坐假寐夢神人告之曰高仙托
體君家塵中不能留也四歲能誦詩七歲其叔父教之
日記千言十歲從其兄遊乎仙巖之下慨然有遺世之
意十三學道信州路桂溪縣龍虎山太上清正一宮之
達觀堂堂之尊師李君宗老嘗有異徵得公而應焉臨

川有雷空山先生者隱居種湖之上深明易老以其所
學著為成書公往師焉他從學者莫之能及也李君避
舍延至雷先生而公得以專受其業雖休沐不出每得
新瓜果之屬必即以歸獻其親無有曠闕十六度為道
士於其傳系則居何君恩榮之次國朝初得江南嗣漢
二十六代張天師宗演入朝張公留孫在行奉勅留禁
近始賜名上賜其後位特進開府儀同三司玄教大宗
師者也至元十四年作崇真宮以居之二十四年開府

徵公至京師公辭其親別龍坡君之墓新墓田之舍以
行是年得入見二十六年奉詔祠南嶽二十八年奉詔
從開府徧祠嶽瀆諸山川二十九年賜崇真宮於浙西
公奉詔宣諭江浙行省三十一年成宗皇帝自朔方還
纂大統公從開府率其屬北迎召見賜公古琬玉蟠螭
之環一有旨設醮於上都壽寧宮五晝夜公專主章奏
特勅命公每歲侍從行幸所司給廬帳車馬衣服廩餼
著為令元貞元年制授公冲素崇道法師南嶽提點二

年奉詔祠中嶽淮瀆南嶽南海大德元年奉詔祠后土
西嶽河瀆江瀆二年制授冲素崇道玄德法師大都崇
真萬壽宮提點三年太上清正一宮災公奉旨與近侍
馳驛命江浙省臣更作之公請與宮之人各以私財佐
有司之不及四年命有司作三清殿及觀門廊廡於崇
真宮設醮慶成上齋而臨幸賜開府及公黃金白金重
幣有差五年公奉旨召嗣漢三十八代張天師與材過
揚州為守臣禱旱雨至京師為達爾罕丞相哈喇哈遜

王禱旱又雨八年公父母年皆七十奉旨降御香於江南諸名山賜對衣尚尊為其親壽於齊老之堂九年作崇真觀於安仁縣賜名曰萬壽崇真觀十年制授公江淮荆襄等處道教都提點十一年武宗皇帝自朔方歸纂大統制授公玄教嗣師總攝江淮荆襄等處道教都提點崇文宏道玄德真人鑄銀為印曰玄教嗣師之印視二品封其父克己翰林學士中順大夫至大元年以歲歉禁民間酒特勅光祿寺日有賜尊上賜公七寶金

冠織金文之衣為朝真之服仁宗皇帝在東宮所賜冠
與衣貴重華異如上所賜公從駕至中都中秋賜宴上
顧其貂裘敝改賜黑貂三百以為衣縷金文之錦以為
祿二年制授公弟子夏文泳元成文正中和真人江淮
荆襄等處道教都提點賜銀印視二品三年公奉聖旨
設醮於龍虎閣皂句曲三山制贈公大父鑑昭文館大
學士資善大夫追封饒國公謚文靖祖妣陳氏封饒國
夫人父翰林學士克已加授榮祿大夫大司徒饒國公

母舒氏饒國太夫人仍賜對衣上尊有旨命公奉贊書
歸鄉榮其親因命設醮於安仁縣之崇真觀以慶成皇
慶元年仁宗皇帝命設大醮於大都南城長春宮公奉
旨投金龍玉簡於嵩山濟瀆是年勅翰林學士元明善
修龍虎山志者序進入改賜崇真觀額為崇文宮延祐
元年公奉旨設醮於龍虎閣皂句曲三山因請歸慶其
父母八十之壽對衣尚尊之賜如初是年傳旨江浙行
省促公還朝制授公弟子毛穎達正德宏仁靜一真人

嗣掌遁甲之祠事賜銀印視二品四年有旨名其鄉曰
榮祿鄉里曰具慶里降璽書護其家六年饒國公之計
至上京集賢以聞勅翰林侍讀學士元明善著碑文翰
林學士承旨趙孟頫書字太子詹事郭貫篆額給傳奔
喪十一月太夫人歿十二月葬父母於其縣崇德鄉之
山田作明成觀以奉祀明年召還京師英宗皇帝至治
元年十二月開府張公觀化於大都崇真宮上聞有旨
歸其喪於龍虎山百官送諸上東門外所過有司治辦

舟車祭遣公請歸職喪不許命弟子崇元冲道明復真人陳日新薛元羲奉喪還二年制授公特進上卿玄教大宗師崇文宏道元德廣化真人總攝江淮荆襄等處道教知集賢院道教事元教大宗師王章一一品銀印一總攝道教事二品銀印一并授之勅省臺百司諭以傳宗之事而大護其教用開府之志作東嶽仁聖宮於齊化門外重修太延福宮三年太上清宮又災公率其屬更作之泰定元年春長春掌教真人闕上用公薦以

汴梁朝元宮孫公履道主之二年公奉旨設大醮於長
春宮又設大醮於崇真宮護教之詔如故事制贈饒國
公光祿大夫大司徒謚文康三年奉旨設醮於龍虎閣
皂句曲三山奉勅葬開府張公於南山之月嶠作仁靖
觀以奉祀四年改造開府所建溪山真慶宮天曆改元
冬公還自上京明年北迎明宗皇帝謁見之次賜對衣
上尊及歸天曆護教之詔如故事追封故開府張公曰
神德真君勅改仁靖觀為神德宮至順二年公進宋儒

陸文安公九淵語錄世罕知陸氏之學是以進之有旨
設醮於長春宮公告老請以弟子夏文泳嗣玄教詔留
公三年有旨設普天大醮於長春宮又設大醮於崇真
宮元統元年今上皇帝即位護教之詔如故事仍改至
元之元年京師旱公奉勅禱之雨冬無雪公奉勅禱之
雪三年公重建饒州芝山文惠觀於永平門外遷番君
之神以居之四年與神德宮明成觀皆被璽書之賜五
年畿內田有蟲螫執政請公禱之三日盡除而仙壇之

成則在六年矣皇元初有中原五嶽之四在天子封內
既得宋而後南嶽之神得而禮焉是以世祖特命開府
張公領其祠至是屬諸公矣長沙有故宋相趙信公葵
之子淇博學多識尤好神仙金丹之事有宜春李先生
簡易者故玉溪李觀諸孫遇異人得丹道蓋以為遇劉
海蟾而得之淇每師問焉未盡其旨而李先生化去後
遇之玉山道中始得其說既內附命為湖南宣慰使輒
欲棄官行其道憂患多故不能如其志公為天子使南

嶽道過長沙趙公見而敬焉曰神氣冲爽而有福德可
以受吾道廼焚香密奉出其書以授之則皆海蟾玉溪
之秘云世祖嘗曰天子當禮五嶽而朕年高不能往每
遣近臣忠信而識察者分道祠嶽瀆后土戒之曰神明
之使馬不至喘汗則善矣蓋歸而問其所聞見人物道
里風俗美惡歲事豐凶州縣得失莫不參伍以周知踈
遠之跡焉公之連歲被命而出每辭以為臣不足以當
大事之重上曰敬慎通敏誰如卿者遂行他日成宗遣

獄瀆使還顧問如世祖故事曰卿遇郡縣有善治民者
乎對曰臣過洛陽太守盧摯平易無為而民以安靖上
曰吾憶其人即日召拜集賢學士公使過浙西時故翰
林學士閻公復為按察使老成文學譽望甚重公時才
踰弱冠議論明正閻公客之不敢忽也後閻公居翰林
益加重焉成宗既崩仁宗皇帝在懷孟未至而閻公典
詔令有狂士危言以訐閻公事罔測公力言諸李韓公
孟仁宗意解及武皇即位遂以平章政事歸老高唐如

世祖待王鹿菴磐故事朝廷得敬大臣之體不以口語傷賢者則公深有以維持之也故翰林學士吳公澄始用董忠宣公士選薦於朝自布衣拜翰林應奉召至不拜去後又召為國子監丞升司業與時宰論不合又去公啟於集賢貴人曰吳先生大儒天下士聽其去非朝廷美事集賢貴人聽公言超奏吳公為直學士吳公雖不赴而天下翹之至元大德之間重熙累洽大臣故老心腹之臣莫不與開府有深契焉至於學問典故從容

裨補有人所不能知而外庭之君子巍冠褒衣以論唐
虞之治無南北皆主於公矣若何公榮祖張公思立王
公毅高公昉賈公鈞郝公景文李公孟趙公世延曹公
鼎新敬公儼王公約王公士熙韓公從益諸執政多所
諮訪閭公復姚公燧盧公摯王公構陳公儼劉公敏中
高公克恭程公鉅夫趙公孟頫張公伯純郭公貫元公
明善袁公桷鄧公文原張公養浩李公道源商公奇曹
公元彬王公都中諸君子雅相友善交游之賢蓋不得

盡紀也薦引善良惟恐不及憂患零落惟恐不盡其推轂之力至於死生患難經理喪具不以恩怨異心則尤公之所長也公博覽羣書徧察羣藝而於道德性命之要粹如也嘗作環樞之堂畫先天諸圖於壁以玩心神明有詩曰要知顏子如愚處正是羲皇未畫前其所造蓋如此故其述作光明痛快足以見太平之盛而深存忠厚於人倫有所感發自幼至老尤好吟詠皆出其天性之自然而非有所勉強尤識為政大體是以開府每

與廷臣議論及奏對上前及於儒者之事必曰臣留孫之弟子具全節深知儒學可備顧問是以武宗仁宗之世嘗欲使返初服而置諸輔弼焉道家醮設之事是其職掌故於科教之方無所遺闕香火之費無所簡吝然而朝廷耗費過重則每日事天以實不以文弭災在於修德而禱祈特其一事爾全真之教叙其祖傳有所謂玄風慶會錄者大德中嘗使人譯之而莫達其意有旨命公論定公曰丘真人之所以告太祖皇帝者其大槩

不過以取天下之要在乎不殺治天下之要在乎任賢
修身之要在乎清心寡欲煉神致虛則與天地相為長
久矣譯者如其言奏之上大感悅不惟丘公之心事明
白而太祖皇帝聖學之淵微亦從可窺其萬一是以君
子深有慨於公之言也公之執親喪也自奔喪至家水
漿饘粥僅足以延息涕泗滂沱繼以血衄喪葬之後力
之所得為者無不盡其力焉山田之域伐石江濱山為
洞穴掘泉下錮深廣高厚葬之日郡守王公都中親助

喪事送葬者連數郡車馬畢至時方寒雨淅淅載途一
夕北風結凍堅冰在地行者無苦人以為孝思所感也
明成觀有著存閣者以致其嚴祀之意方外之士感其
孝思知慎其親之存沒自此始矣其事開府也先意承
志周思廣慮所以事朝廷尚道教無絲毫有所違拂開
府泰然委之而不疑確然信之而不惑所以能有立於
聖世者非惟運數則然而其誠心相孚亦有以致之也
其葬開府於南山也饒信撫三郡守將以其官屬會葬

江南諸名山之主者皆來竣事伐石題名而退擇卜之
慎營繕之勞工力之博賓客之盛東南數十年間未有
能彷彿其萬一者公之盡力於其師與所以奉其親無
二矣久之作南山諸詩沉鬱哀慕識者讀而感焉東南
道教之事大體已定於開府之世而艱難險阻不無時
見於所遭裨補扶持彌縫其闕使夫羽衣黃冠之士得
安其食飲於山林之間而不知公之心力之罄多矣公
之宗系別居於達觀堂者尊顯獨隆於他支封真人者

凡數十人奉被璽書主宮觀者尤不可勝紀其姓名別有述公平生畫像之贊及大父母父母與其身之所奉被贊書及諸堂室記頌皆一時名筆別類為書曰天爵堂類編并其所為詩文曰看雲錄者通若干卷集賢直學士揭傒斯奉旨作序以傳於世皇上即位之初親御翰墨書閒閒看雲四大字題曰賜吳上卿識以明仁殿寶勅御史中丞馬祖常太常歐陽玄為之贊至元六年九月初一日大駕自上京還次懷來燕坐幄殿集賢大

學士布達實哩等以上卿之言入奏曰御書四大字臣全節既刻諸樂石又模勒於文梓為四鉅榜塗以黃金周以雲龍之飾以其二賜崇文宮閣而度之請錫名曰龍章寶閣又以其賜達觀堂先朝嘗賜玉璞命攻玉之工擬太上說經之像刻數年而後成請以歸之達觀閣而祠之請錫名曰玉像之閣而御書二榜揭諸其上矣有勅命臣某為之記而文惠觀河圖仙壇并命臣某銘之臣某先已記仙壇之記如右謹再拜稽首奉詔而為之著銘曰

疑乎茲山厥名河圖地闢天開孰究始初則圖示卦
庶聖歷述山藏無聞傳者周易易老之通同原
殊宗或隱或彰閱在道宮有崇丹丘仙壇是作玄契夙
符龜筮從若門人弟子作之三年夫子致間有責其園
清靜佐理啟自神德維帝外臣歷世無數在今宗師有
為有文孝親敬師致忠於君寵光道家冠代邁古白髮
蒼顏長侍帝所遺老故臣沛然從遊紀德論交金石不
渝量宏智周用世何有却而不居有相其道天子聖明

昭惠老成龍章鳳書玉質金聲有懷故鄉有棟有宇神明攸居山木翬舉盛德孔容象其粹冲聿嚴敬共以報顯融有嘉豐草呦呦鳴鹿天降甘露灌濯神穀維昔廣成宅乎空同千歲不衰穆其清風肅肅吾壇圓方平直奇耦參兩俯仰有則修名度方天子命之刻詞孔貞來者敬之

靈惠冲虛通妙真君王侍宸記

至順三年夏樂安縣尹蒲君汝霖以書來告曰在延祐

庚申汝霖同知南豐州事六月州境大旱禱諸山川弗應
州人言有侍宸王君祠在神龜岡所謂妙靈觀去州數里
侍宸宋徽宗時歸而沒於其鄉其神至今有靈異盍禱諸
汝霖以雨為己任親往禱焉既得卜乞靈水於岳登舟以
還有蜿蜒浮水而來者紅光赫然雲氣隨之州吏以器迎
之即就器蟠不動及州門雨垂降至公署而大作是歲稔
明年又旱吏民以汝霖前禱之應也諉汝霖仍往其應如
去歲歲又稔於是歲州之父老來告曰侍宸之恩不可不

報生有道術著於時沒又惠澤及其民宜白朝廷有以表異之南豐下州也而不統於郡得專達行省乃以侍宸事為文書上之既聞於朝事下太常博士議曰君故宋時已封沖虛通妙真人宜加賜靈惠易真人曰真君是時有臨川道士唐樂真以法術承應內廷是年以侍宸教法禱雨京師有應集賢院亦上其事故朝廷知之而得封甚速也命既下而汝霖學製錦於樂安去南豐三百里而近增封之命至斯所以侈上賜而繫民心猶

汝霖之貴也公在太史幸為書其事於石汝霖以鄉人請私焉按臨川盱江志宣和間有南豐人王文卿字予道號冲和子生有異質嘗為詩告其父有方外之志父沒辭母遠遊渡揚子江既濟行野澤中雨暝迷路見若有燈火者就之有老嫗為逆旅者得文書數卷篝火讀之雨霽火絕天且明乃在大樹下無逆旅也其書蓋致雷電役鬼神之說云以是濟人甚衆名聞江湖間當是時徽宗崇尚道教嘗夢得神人以形求之得侍宸焉賜

見大稱旨拜太素大夫凝神殿校籍其官道君別置道教
官也大夫校籍位已尊矣賜其父承事郎封其母曰宜
人京城有狐為妖人為立狐王廟瑤津池又有妖蓋黑
鯉也奉詔劾之狐鯉皆雷擊死將有事於明堂而雨不
止君禱之立霽有詔獎諭拜金門羽客自校籍升侍宸
賜號冲虛通妙先生淮南北以無雪告上憂麥以告侍
宸遂大雪麥熟賜金帛不受盜起山東徒黨號巨萬郡
縣不能制聲勢張甚召見便殿上以為言對曰當以神

力助討他日獻捷者言天大雷電賊乃潰而道君遂歸
功於侍宸矣而侍宸實預知天數數數以修政煉兵為
請不暇聽其說乞身歸田里求去不得一日拂袖徑還
南豐未幾宋南渡紹興二十三年八月二十三日為酒
食召鄉里飲別書頌脩然而逝既殮舉棺而葬之甚輕
蓋尸解云神龜岡其墓也其靈異之事相傳不絕侍宸
歿而能福其鄉之民蒲君去他官不忘其舊民嘗受侍
宸之賜其仁惠皆可錄故書之使邦人有所考焉予既

為前南豐倅蜀人蒲汝霖著侍宸王真君碑後六年為至元庚辰十月上清外史薛元卿以書來告曰有番禺胡道元先生人間所謂神霄野客者也得侍宸之真傳年二十餘道行闕陝荆襄江漢淮海閩浙之間當己巳庚午之早旬日之中郡縣爭致之所歷或一日或二日嘻笑怒罵雷雨隨至官吏畏而民愛之環四五千里之間所至無不應者至於妖怪之作効治如法人以為神遇異人於武當大頂天柱峰得修仙之道徧游名山洞

府而歸江東西之間從蓬頭金公遊甚相契許他人莫
之測也於是收歛神異之迹將求名地以歸隱是以謁
浮丘君於華蓋之上道過黃茅之岡故使子得見焉既
見則為余言曰神龜岡碑所載事有未備者請述之云
若侍宸自南豐辭親而至揚子也所遇而得書者火師
也火師者蓋上古神人而世傳為汪氏子華者蓋其化
現爾其囑侍宸之言有曰吾身一天地天地一陰陽握
其機者在我而已子當以是應元徵佐明主吾待子於

神霄之上矣侍宸退而修諸其鄉軍峰之陽所坐磐石猶在及事道君皇帝位至侍宸道官之尊貴與文官侍從等其後又遷冲虛大夫賜金方符使叩以入禁衛加贈其父曰承議郎母曰令人宮中人多病者上以問侍宸侍宸曰此有物怪爾當劾之坐未退天忽晦冥雷電交作頃之霧一白龜甚大震死矣病者皆起揚州守臣以旱告禱雨不應道君以問侍宸對曰下民多罪上帝震怒水不可得道君強之侍宸曰無已惟黃河水可借

三尺耳數日揚州使至奏得雨皆泥潦計其時乃奏對之日也侍宸既以國亡妖孽為奏不見聽而還上思之畫其像而親為之贊既居鄉鄉里無水旱疫癘妖怪之事千百里間雖亂離而帖然高宗定都江南將二十餘年聞侍宸猶在命守臣物色之有詔曰勅王文卿先朝高士退隱林泉枕石漱流多歷年載兵戈之後杳不聞音朕甚思之其出山一來以副虛佇又敕守臣以禮津發辭以老病不復至闕使人畫其像以進亦親題贊世


人多傳之歿既久侍宸之從孫以貧從商人入蜀親見侍宸於道中弗識也執手江潯多所傳授曰明日渡江某觀中可相尋也明日至其觀悄然無人一高堂中有畫像則侍宸之祠也始知其所遇傳授者乃其大父也又明日又遇之以幅紙與之曰此孫至家上官甥以吾書盡授之妙濟歸告上官上官弗信出其書視之上官識其手蹟號慟仆地盡以教之際遇寧宗朝法亦大顯賜號妙濟先生名嗣文蓋妙濟初年不甚識字嗣文亦

侍宸江潯所命也又有薩守堅者亦酷好道見侍宸於
青城山而盡得神秘游東南禱祈効治其神恠有過於
侍宸者游江西入閩過神龜岡乃知侍宸為數十年前
人云昔侍宸在汴京居宮觀見為黃冠者多諂事權貴
以自衒惡之故多不得其說其在鄉既老而得其傳者
則新城高子羽授之臨江徐次舉以次至金溪聶天錫
其後得其傳而最顯者曰臨川譚悟真云人不敢稱其
名但謂之譚五雷內附後譚君猶在浮沉人間隱顯莫

測廬陵有羅虛舟者故宋時名士澗谷先生之諸孫也
得五雷之傳甚有符契然譚君誦侍宸之戒曰每傳不
過一二人若廣泄之則速死是以羅之弟子雖多而自
以為得之者惟蕭主簿雨軒其後則有周司令立禮兩
人而已周與予有姻聯然終日言之未嘗及此蕭君清
文雅學中罹憂患然甚通至理泊然無所累其心予敬
愛之而亦未嘗言及之也周之說惟授之其子游其門
者或得或不得予不知也蕭君儒者擇人至謹而人亦

不知其有此道獨傳之道元胡君一人而已神異之事
已見於前其客於予者頂分三髻一劍自隨練衣短裙
危坐終日風雪極寒之夜燈火不繼而溫煦滿室目神
炯然神觀洞徹縱橫自在物外無拘而剛介不可犯也
此亦真修仙者乎有侍宸手書詩一首蓋譚羅相傳之
符契也且曰吾將隱矣當求人而付之必也戒行若冰
霜立志如鐵石曾次如水月氣象如陽春又雖生尊貴
之家而世有陰德學乎清靜之門而身有福利者則以

授之果爾其亦難得也哉雍虞集記



道園學古錄卷二十五

欽定四庫全書

集部

道園學古錄卷二十六

詳校官庶吉士臣李如筠

侍讀臣孫球覆勘

總校官進士臣朱銓

校對官中書臣王學海

謄錄監生臣王鳴岡

欽定四庫全書

道園學古錄卷二十六

元 虞集 撰

供醮文

水陸會功德山文

我國家聖聖相承深仁厚澤浹於人心累洽重熙多歷年
年所今上皇帝濬哲文明纂承大業好生之德已洋溢
於萬方恭已之誠思貫通乎上下海涵春育無間幽明

雨順風調大同遠邇聖恩盛大蔑以加矣而萬幾之密
猶垂念於隱微九有之師或未該乎冥邈勝修法會式
究淵衷乃修水陸冥陽大齋于萬壽寺自三月一日啓
建七日滿散乘法寶之威光成金心之願力播蓋香華
種種妙饌齋儀梵唄一一圓成凡我佛子昔自多生歷
酬定業或以刀兵水火或以疾難飢荒沉迷五濁之惡
塗未返一真之本性遇良因於今日得勝妙之現前渴
饑並獲於清源苦惱悉超於極樂來生佛土祇奉明時

回向菩提增崇聖壽臣等迺稽首而作偈曰

聖上運大慈憫諸有情等作此大勝會供養佛法僧勇識妙
蓮華諸大阿羅漢畢支迦五明金剛大威德護法諸龍天凡
在虛空界敬禮等無二開闢諸方隅光明悉照耀迺至
諸明哲往昔善持世四生及六道凡在苦趣者悉皆承
佛力來赴於道場心花得發明諸識轉為智一切現苦
業消滅無復續巍巍大功德皆由聖心起我聞昔有人
積寶如須彌持施得福多恒河沙難喻我皇勝妙因福

報不思議視彼施寶者千萬不及一我等佛子衆各生
慚愧感稽首贊吾皇聖壽千萬歲與佛共悠久

水陸會緣起文

原夫一靈圓妙本不昧於昏迷歷劫無明遂有淪於流
轉我佛興大憫念開方便門譬彼宵征遠道冥行荆棘
之林我以慧炬照之則前進無殊於白晝又如往濟大
川忽遇風濤之險我以慈航渡之則安行無異於陸途
施平等於無方悉資揀度嗟幽沉之有苦尤切哀矜於

是目連感定業而生悲觀音化面燃而啓教十方諸佛
共弘應供之名六道四生亦攝菩提之海大士仰承於
佛勅道場肇建於當年孤峯接雲海之空明白日映江
潭之澄澈神靈交會凡聖混融分八位上下之殊作萬
劫圓通之施傳流既久證驗尤多我今上皇帝與佛同
心如天之覆念生成之類已在於鈞陶而冥邈之蹤尚
迷於出沒迺鑒人天之意大修水陸之儀爰命國師俾
提法要迺以三月一日於大都萬壽寺修建水陸無遮

法會七晝夜上資善逝之恩光下拯孤魂之陰昧香積
普熏於世界盡斷惡緣妙蓮應現於池中悉離苦網咸
來佛會共沐帝恩逍遙極樂之鄉不墜輪迴之境共報
聖明君乃說偈以贊曰

一切衆生皆具佛性如摩尼珠五色随映如何累劫業
識相因無明展轉生死根塵我佛慈悲施方便力如大
醫王救彼痼疾餓者令飽渴者與漿幽闇與明熱惱與
涼況爾六道諸苦隨業不藉佛恩何由自潔聖皇在上

運大仁心樹旛慧幢立功德林作此道場期七晝夜平等無碍均一高下光明圓滿如佛現前孤魂沉重懽喜慶筵如是勝因增崇聖壽億千萬年堅固悠久

建國醮建壇青詞

荷天洪休膺國大統肇惟元祀奉若明禋殊庭修秘祝之嚴肅拜候景光之集伏願環紫壇之納陛闢黃道於叢霄天極旋樞日星昞曜后祇薦祉川岳闡珍用期泰定之民均被豐成之賜

朝詞

聖祚在躬肇啓乾元之歲道宮修禮丕昭答貺之誠禱
以再三鑒茲精一伏願乾元統御坤道順承時對春陽
導本支之鬯達紀增神策保宗社之奠安遂以生成均
陶動植

三清

荷天地之洪休晉承繼序奉祖宗之成憲思究彌綸期
敬達於丹誠惟謹資於玄教肅將蠲潔用極依歸伏願

慶衍中朝仁儲大本休明佑啓百神受職以安寧福祚
延洪萬世奉天而長久

昊天

入膺丕緒有命自天載省眇躬無疆惟恤啓淵衷之至
實感真貺於太虛伏念比屬盛時俄慨堅冰之早辨永
懷讓德不忘皦日之初心迺正誼以廓清期與民而寧
一用發憂兢之慮悉紓對越之恭伏願乾御陽剛坤成
地道祖宗陟降同保佑於高明家國治平丕顯承於悠

久

后土

集基命於眇冲始建初元之紀覽幅員之廣袤益思大
業之興祇若寶圖誕敷金籙伏願玄功有造至德無為
道致謹於順承協成泰定物資生於厚載保合乾剛協

醺星祝文

太陽

赫赫太陽秉陽之精照臨天下運我皇明克循克軌永

底隆平

太歲

翼翼倉龍集于巽維紀綱百神運行四時相我君道壽
我皇基

歲后

於赫歲陽配于陰宮承于大君內治之宗以生以成登
我歲功

金星

奕奕長庚煌煌啓明主我兵事宜順其經弗僭弗忒邦
家以寧

太陰

明明太陰配陽麗天主國之刑勿忒其躔以順以寧于
以永年

室宿

惟乾之維是為營室炳耀定中景命有翊廣開天門相
我無數

天剛

龍角在田帝車所持聖人之生次舍在斯攝提衆星萬壽是基

病符

歲德所紀主病有符視其侵祥傍射在隅於赫景命靈其祓除

大耗

歲有瀉神耗之大者集于乾隅衝照辰舍乃謹祓除勿

害純嘏

土星

煌煌鎮星位于中宮行地無疆承天之功用集嘉福懿
範是崇

小吉

鶉首之舍月后所臨東井洋洋景耀昭森扶我元懿萬
福來歆

喪門

左挾丁符右接坤隅孰敢啓門當我吉居祈祇不祥以
寧皇輿

金星

太白之精其神孔武憶我南西孰祓孰禦宜斂其祲勿
間多祜

九月十四日高昌王大夫傳旨作醮星文

元辰天罡

於惟聖皇受命于天斗車提綱龍見天田萬物振羨威

信是宣以介景福樂只萬年

羅睺

赫赫有威惟天之首日月之行交道豐蔀烜兮照臨景
命先復克相有道天子萬壽

室宿

熒熒營室天之玄宮以藏以息肅肅雖雖乃瞻元台惟
茲是從錫福未央如定方中

小吉元辰

位南以西爰即于坤東井洋洋有溉其源肅肅中宮景
命在垣元吉之福既昌以蕃

太陽

赫赫太陽曰躋于乾順德維坤承暉弗愆昭光播和若
春在暄萬福來臨與天齊年

參宿

載瞻參墟明星煌煌乃占其書孝謹忠良肅肅中宮景
命溥將儷于聖明既壽永昌

太充元辰

有嚴太衝維震之宮青陽載熙木德乃通時維聖子景
命是逢導之太和被之仁風

太陽

日之行天至尊以光誰其承之維青之陽輝輝煌煌繼
照四方星輝月輪永保無疆

斗宿

斗為天機日月耀芒酌量政事褒進賢良於維聖子元

台是當錫福自天欣欣樂康

太陽

東望扶桑赫乎九芒下被萬物麗天為章東賓西餞靡
朝敢忘錫我景福於昭輝煌

太白

肅將金行司天之刑順軌出入厥有常經掠於軒轅占
者以告敬恭用禋景福來報

軒轅

粲粲軒轅黃龍之體属于内廷占者所紀長庚來干非
順之軌載祭載禳轉作多祉

太陰

占象于坎受陽以光配於大明流輝四方天清地寧軌
道有常介我景福萬壽無疆

太歲

歲維昭陽辰在協洽神君所臨萬靈來合皇皇景祚奉
德秉法我將我享嘉佑斯答

白虎

於菟眈眈為兌之神為素為刑莫之敢嬰迎祭于西為禮孔殷神其食之介福來臻

大耗

滿庭之過神則害今從而虛之孰可賴今占歲之行厥有恒所尚易其嗇豐我多嘏

迎神

肅肅靈臺三光下臨旨酒牲牢嘉幣吉金肅將祀事罔

敢不欽赫赫洋洋神其來歆

送神

靈臺有享神具來格其祥如雲其近如日嘉禮告成景
貺秩秩相我寶祚於萬千億

醺星祝文

迎神

肅肅清臺歷象是司維天有神維土有祇爰潔牲幣以
禱以祈歲祀奉迎靈其鑒之

太陽

出乎暘谷升乎榑桑麗于中天照臨下方愛而燠煦畏
而蒼涼戚畹有禱降福穰穰

太歲

煌煌明堂歲君攸居位于鷄首殿乎坤闥東井洋洋士
德之基錫我嘉福順我禱祈

歲后

歲德至尊歲后配之黃裳元吉象服是宜理其內教以

佐無為沁園有禱卻除病留

勝光

陰之始生實自於午於卦為姤柔順斯主皇有懿戚元
辰麗焉是用禱祠惠我安痊

土星

中黃正炁維土之神神氣上騰煌煌向晨元辰有宮其
光來燭鑒于戚邸悉茲多福

婁宿

維主之生誕彌其月邇其元胎在魁之揭其宿維婁光
耀煜煜除我疾疢安康毋越

病符

六氣不齊庶疾乃生維其司之有神孔明執其靈符以
佐歲行禱以嘉薦惠我安寧

金神

五行之中金主肅殺有神孔威司是嚴伐歲行遇之伊
怒孰遏享我忱禱毋敢凌越

災殺

沴氣所生曰能致災以殺為名不亦暴哉和以嘉醑柔以嘉脯順而好生永錫多祜

喪門

白馬素車人實忌之孰啓其門有神蒞之上帝好生爾獨何為攝而憐心安我戚闡

五鬼

五氣之歸其名為鬼絀而弗伸有繁厥類載以酒漿道

以車船既享而除勿為禍愆

青龍

星有角尾其象維龍蜿蜒蜿蜒東方之宮木德司春為
善為仁永錫嘉祥百祿是臻

白虎

昂畢之上其象維虎有虓其武在西之許金德是司為
義為刑尚斂其威美疾用寧

送神

陽主于德陰主于刑刑斂德揚陟降在庭既享既歆以
安以順神還應遲福以時進

醺星祝文

迎神

欽若昊天觀象知微爰即靈臺秩祀惟謹大庖既享大
尊既盈神其格思來享克誠

太陽

東望扶桑赫曦來升羣陰既伏萬國咸承朝賓暘谷爰

禮斯在齋宮告誠綏祿萬載

太歲

煌煌歲君臨於端門有烜朱方歲德攸存當離之明如
日斯赫降爾嘉祥以輔有德

天罡

蒼龍之墟左為天田神蛟應龍景命所躔斗為帝車惟
剛是指相我有道來錫繁祉

小吉

維鷄之首土德是毓是為吉神厚德嘉福宮壺嚴嚴景
命所臨徽柔懿恭式薦其欽

功曹

寅為人統其方析津肅肅青宮盛德惟仁煜煜箕尾保
我景命克長克安以輔明聖

歲星

盛德至仁所主為歲長養生成福祿攸系煌煌景光臨
照有方一人以寧萬國彌昌

羅喉

明離有神維南是司承其餘光
劒戟孔威其威孔揚其
福亦厚來降來享作我嘉祐

太陽

明兩作離繼照四方赫其有輝
照我青陽青陽有煒百
福來委俾熾俾昌以承天子

太衝

木德之盛次於震方至仁應規
以佐青陽迺錫嘉福以

暢元氣帝后萬年本支百世

太白

長庚之精司兵司刑煜煜其輝輔日而行斂爾光芒順
爾軌度以安以寧佐我昌祚

熒惑

赫赫炎炎揚光於天孰當其鋒奮烈莫前維國有道宜
順軌則順行為福以相有德

歲后

黃裳元吉以順為則佐於歲君豐阜民物靈臺有祠敬
恭禱祈陰陽理和百福是宜

青龍

東方蒼龍至仁至靈角尾之間赫乎明庭青旂蒼玉禮
祠維肅蜿蜒蜿蜒來降景福

白虎

兌為白虎至雄至武其德為金威怒孰禦白旂素車象
德以旂風其從之百祿是宜

送神

成象於天降靈於地國有令儀克致禱祀禱祀敬恭神
歸匪遲天子萬年福履綏之

金籙普天大醮青詞

建齋詞

續述丕圖恪奉祖宗之訓導迎景貺永綏家國之基冀
輯福于眇躬暨息菑于中壺垂象每懷於示儆祈年尤
切於好生伏願慶衍宸闈祚隆繼嗣乾和保合三光全

而寒暑平坤厚順寧五穀熟而民人育

祈嗣密表

祇荷鴻休肆膺神器念祖宗之付托思民社之依歸重
惟繼嗣之隆實繫本根之固敢嚴秘祝用格高穹伏願
錫祚慶圖申受上天之貺儲祥寶系益崇萬世之基

皇后保安密表

寅奉上穹申言中壺克相憂勤之念每嬰疾疢之虞冀
導嘉祥用綏福履伏願高晨鑒格正氣宣通天清地寧

保太和而合德家齊國治均厚福以資生

建壇詞

奉丕基以臨萬國于今有年類上帝而徧羣神肇修秘
祝仰輯薄天之慶俯將率土之誠紫壇森列於人文丹
闕昭回於象緯伏願天垂甘露地發醴泉靈風受職以
周旋道氣成章而鬯達永符至順孚佑皇元

第一日早朝祭皇天后土三界萬靈上資宗祧先
聖凝神沖漠垂祐邦家祝延睿算保固丕圖中

閏齊年本支繁衍

月律應時卦極正陽之盛天根開景氣升清旦之初通
變闔於雷風妙流行於山澤均承主宰咸赴禱祈伏願
聖祖神宗陟降洋洋而在上皇天后土卑高秩秩以分
儀迺發禎符用隆寶厯延齡維永尚期嬋德之同錫羨
有輝更應多男之祝

午朝祭日月星宿祈日月齊明星辰順度

離為日坎為月瞻陰陽交易之機天應星地應潮察上

下盈虛之候儼宸居之伊邇望晷景之方中敷宣藻笈
之文朝步琅霄之境伏願赫曦繼照煌煌旁燭於萬方
素曜並明肅肅順行於九道帝車臨制四序成功雲漢
為章五緯咸若副此乾乾之兢惕錫予郁郁之嘉祥

晚朝祭五嶽名山祈社稷奠安宗藩輯睦風俗
醇厚百辟忠貞

覩符瑞而告功升中斯在出雲雨而及物望秩攸崇巖
巖民庶之具瞻肅肅天真之下治即秘祠而用幣及初

夕以飛章伏願方嶽奠封靈祇受職宗藩輯睦永綏磐石之安風俗清淳長被膏雲之覆

第二日早朝祭聖帝明王先農后稷消穰水旱蟲蝗祈五穀豐稔民物阜康

繼天立極亶惟上帝之聖神開物導民實贊無為之化育道秉機緘之秘教興衣食之餘功叙九歌業隆萬世藉白茅而明薦望素履於虛皇伏願無聲無臭以作孚鑒此小心之昭事不識不知而順則密符大德之好生

民風馴致於雍熙國祚誕膺於長久

午朝祭風雲雷雨祈風調雨順寒暑應時

鼓以雷霆潤以風雨彌綸功用之神求諸形體原諸性情主宰玄元之造觀萬物散殊之迹知兩間旁薄之仁無為而成有相之道日麗端門之景雲開祕笈之科伏願天德潛符歲功咸遂九農百穀無旱乾水溢之虞四海羣生享安靜和平之福庶釋憂於宵旰用和惠於春秋

晚朝祭四海四瀆祈山川定位海宇清寧

一元合氣乘風澤於洞虛百谷來王出淵泉於溥博首
五行而善利潤萬物以資生貨殖用興舟楫以濟稽古
玄圭之錫沈茲蒼璧之章伏願地平天成府修事治玉
書保運制衝潰之洪波寶穡宜年動滿盈之甘澤民安
居於樂土國養德於長源漸被所同旁薄無外

第三日早朝祭三洞四輔經籙傳教宗師祈百神
效職臣鄰忠孝國祚延長

太元結氣冥思浩劫之初妙有垂芒朝徹延康之上參
贊化生於物始傳流神寶於人間保昌運以長存握真
符而不宰將輯簡穰之福茂陳敷落之篇伏願乾歷開
天坤彌闡地種民在宥颺言清靜之風景命溥將相協
元同之造忠言彙進道德彌光

午朝祭左社右稷城隍社令祀典神祇祈民樂太
平物無疵癘兵寢刑措疫癘潛銷

泰社之土五色重嘉穀之屢豐方澤之樂八成致幽祇

之畢出帝命作九圍之式神靈會萬國之封力扶玉局
之安寅奉璇霄之降伏願泰階昭晰坤道順寧物阜民
康無疵癘札瘥之害兵寢刑措皆生聚教養之時以至
永年並依玄造

晚朝祭九壘土皇幽陰主宰資度忠臣義士兵死
橫亡六道四生俱登道岸

禮樂鬼神信顯幽之一致生成變化知闔闢之無私即
昭明君蒿之間布風雨霜露之教三光攸燭九夜斯煌

伏願帝命下招天陽來復玉袍犀甲禮余忠義之魂瓊
簡羽章起厥幽沈之趣羣類並躋於道岸泰和庶協於
明時

散壇

五時列祠煜煜紫壇之燿火九宮飛步雍雍碧落之空
歌備成絳節之朝敷散瑤華之景元科有誠至敬無文
伏願陟降在茲達玄黃之玉氣福祿來下生丹碧之芝
英普與羣生恭承嘉惠

設醮詞

三清

奉承寶位對太上之顯光保佑眇躬罄淵衷而忱禱肅
清璿館修設金科伏願元氣絪縕冥風舒鬯室家祚錫
膺福壽以咸宜宗社臣民荷禎祥而均慶

玉帝

維天與祖宗既全畀付自身而家國悉有禱祈爰啓真
科用干洪造伏願鑒觀倣懼孚佑眇冲保和宮壺之安

錫羨本支之盛至于臣庶共樂生成

星主

星環次舍仰瞻天極之尊氣幹陰陽妙宰帝車之運景
光來下祕祝用陳伏願司命紫微自中宮而錫福儲祥
寶系率下土以蒙休

天皇

坤拱神圖妙秉萬幾之會坐臨華蓋旁分六甲之司歲
祀殊庭承禧穹宇伏願抱極樞而環照皆占至順之祥

奉天一以尊居增授泰元之炁

后土

奉若柔祇配皇天而立極統臨廣寓宅吉土以升中為
國有祈維靈斯答伏願羣生成遂九有莫安玄乙親祠
綏保徽音之嗣黃流用裸燕貽翼子之謀

至順二年十二月二十三日祭星常國公奉旨命撰
祝文

迎神

灝灝圓穹三光昭明四方八維柔祇利貞蜡通百禩歲
事告成犧尊多儀來享克誠

天剛

天眷萬方篤生聖明受命溥將攝提建貞天田之上左
角所經蒼龍致福萬歲咸寧

羅睺

受天明命百靈翊扶旁燭有光赤熛之餘首乎天經形
隱弗舒戢爾矛戟迎祥帝居

室宿

河有天源木貴天根帝命降祉元台為尊定之方中煌煌煒煒推而祀之萬福之門

弔客

昊天成命如日斯照運行推移載占其小有客冠素適據隅兆祝而祓之易號以笑

小吉

乾以天健坤以地厚鶉首之墟土德孔阜肅肅中宮元

命昭祐六五黃裳元吉之繇

太陽

日以像君月以像后陰承陽輝萬福備有晨光熿融晝
景煥明以壽以安以生以成

參宿

參墟耀靈土德長生台息其和發為滋榮正位居體西
南利貞培本長源萬福來成

金神

中宮土德位南之西太白流英挾威以躋雄毅肅嚴戈
鋌利犀尚革而從降福孔皆

太衝

煜煜青陽震雷之門玉兔肖類蒼龍儲恩帝胄天錫景
命翊元東望孔祠扶桑載曜

太陽

肅肅紫微前星有輝上承天光仰接日儀煦煦為春明
明在時陽德粹純品物咸熙

斗宿

星回于紀斗臨漢潢璧合珠聯三辰齊光震風元台肇
此青陽司中有神源深流長

白虎

木性東榮金行兌勝刑德之交史謹其徵於菟眈眈負
隅若闔率義從仁祈報斯稱

病符

六氣之邪孰執其契歲行神從臨午之位青陽占運適

與之值祝以移精安和允濟

太陽

靈臺有祀報本主日仰瞻陽光步我神庥歲周星回天
序有秩牲幣敬共嘉惠申錫

太歲

日月次周成我歲功百神具來羣蜡畢通明堂嚴嚴盛
德容容享我報祈以興嗣豐

青龍

龍有德維木之仁大明生東獻歲發春時而淵潛時
而奮申施惠自天至于庶民

歲后

赫若歲陽其配在陰以肅內治以保中臨丁女癸妃其
從如林通幽達微鑒德以歆

送神

神來如雲神惠如雨彌天映日惠澤周普歲行維新秩
祀咸舉相于皇明永作神主

黃籙溥天大醮青詞

建壇詞

歷念先朝悵神游之日遠言修祕祝導靈氣之時升闢
玄景以通誠建紫壇而經始伏願懸珠空境扶玉方輿
風馬雲車順陰陽而陟降龍章鳳篆舉幽顯以鈞陶

第一朝回薦皇朝宗廟列聖神儀

肅肅在廟永懷弓劍之遺濯濯厥靈恒若羹牆之見爰
資神筴用導英儀伏願列聖齊臨萬真環拱寅賓出日

返往駕於中天妙合迴風發化機於厚地

第二朝回薦濟雅圖皇帝

企仰山陵想音容而永慕顧瞻霜露感時序以增哀爰
即紫壇興迴玄馭伏願天健其行而無息日窮于次而
又新神氣昭明式慰臣民之望景光旋復更貽奕禩之
安

第三朝回薦皇親國戚一切靈儀

藩屏國家實屬本支之盛沈淪泉壤每傷幽顯之殊朔

璇宇之流光迴銀潢之逝水伏願會陵絳闕受煉朱陵
在河嶽在星辰還復生民之始闕

永承丕

祚之隆

第四朝回薦后妃公主嬪御靈儀

禕綸在御歷思儷極之尊車服充庭徧念穠華之盛慨
生存之弗永致薦悼以惟勤伏願施德自天資生繇地
性靈不昧釋然幽滯之懷運祚無疆仍會聖明之樂

第五朝普薦勲臣宰輔文武官僚

追懷神聖修殷薦於曾霄爰念臣鄰

闕

於厚壤俾

偕膺於金錄庶仍從於瓊輿伏願受日之光承天之佑
圭璋濟濟眡王國以並生明典昭昭秉民彝而不昧

第六朝普度兵刑橫死男女衆魂

內修外攘寧免兵刑之用上征下暴更深泉壤之悲拯
無告於重陰實有資於大造伏願天光旁燭地氣昭升
斷者續死者生頓釋幽關之故想病者愈憂者樂永為
化國之新民

第七朝普度普天率土兆姓羣生苦爽窮魂幽靈
等衆

國家每念於生靈則修治道體魄或淪於苦趣更轉化
機啓勝會於今晨廓迷塗之宿業伏願陽開陰闔天施
地生執籙把符仰至真而得度葆和正性囿大化以長
年

第八朝專為和安天地調順陰陽保國寧家康民
阜物

存順沒寧極幽明而無憾往禪來續妙化育於不窮宣
金籙之玄文保蘿圖之景運伏願乾坤毓德日月垂光
列聖在天共敷恩於祚胤一人有慶永錫福於臣民

第九朝昭謝皇天后土岳瀆山川陰陽主宰

天佑邦家總基圖於九有日臨海宇妙樞紐於羣生仰
三景之高居罄一忱而昭謝伏願降年有永錫福無疆
凡在臣鄰咸保忠貞之節庶幾民物常依道德之光

解壇詞

肅肅紫壇既備九朝之禮煌煌金籙益增列聖之光熙
事告成誠心孚格伏願神隨天運福被坤輿瑞日祥雲
常麗曾霄之景太山磐石永隆萬世之基

設醮詞

三清

天眷基圖列聖繼守成之緒時因歷數先皇成厭代之
期敢緣追遠之初心普致闡幽之忱禱伏願開明三景
敷落五文九轉成真既備生神之妙百靈交鬯復還象

帝之仍闕錫壽祺并祈康阜

玉帝

昔扣玄穹導近親之神識端臨素幄致大寶於嗣君乃
陳祕籙之科溥濟幽關之趣伏願昭宣天德旋復氣機
陟降帝傍九族逍遙於金闕經綸宇內羣生成遂於縣
圖申錫長年永依妙道

后土

基圖鞏固每資厚載之功體魄歸藏謹候昭升之氣降

璇宮而來享鑒金籙之敷宣伏願效法成能資生有道
超神太極齊日月於中天合景至陽綏子孫於下地

東極

先皇厭代因軫念於幽局上帝好生爰禱祈於東極興
瑞光之遠逮引羣識以俱起伏願甘露霽林慈雲就日
丹鑒寶蓋並從妙道以高居玉厯金符永鎮生民之極
樂

風伯祝文

東朝有命祇肅元壇上帝鑒臨萬靈率職咨爾風伯塵
路惟清戢暴扇和熙事用成急急如律令

雨師祝文

咨爾雨師灑道是司和陽散陰相成祝釐

皇后修設黃籙大齋齋意

言念宗親將薦誠於既遠遽罹大故屬在疚之方深肆
嗣皇繼序之新申前日籲天之實普超幽爽咸濟生靈
伏願道妙無方真游如在升九霄之神氣衍億載之昌

圖凡圉化工並承德施

正薦位白文

言念先朝列聖帝室懿親蚤遺體魄於人間思導神明
於天上鼎湖弓墮俄興臣妾之悲丹闕禮成既得基圖
之托及燕休於長樂申祈禱於太清惕然霜露之寒恍
若風雲之會龍儀虎衛陽光照灼於朱陵貝闕珠宮明
水激揚於東井願金支之並濯與玉氣以俱升穆穆乎
秉德以肅雍洋洋乎在帝之左右輯和九族驩娛還若

於生存旋歷曾霄感爽頓忘於凝滯返至真而無外與造化以為徒況王政施仁必先無告而大鈞播物何間有生更推滄海之餘波徧及幽關之苦趣妙機所運道化同超明則復為人亦我聖神之賜斂而錫之福庶乎寬大之恩嘉與明時共躋壽域惟天地日月合德合明保子孫黎民能安能久

孤魂榜

生死者晝夜之常汝勿認昭昭靈靈之識坎離者乾坤

之用吾以開生生化化之基茲者清朝稟承慈極尊尊而
思逮於凡下親親而念及於幽遐導揚列聖之法筵普惠重
衆之苦趣如茲良會實號希逢汝孤魂等昔受天地之降衷
其初皆善各累形氣而逐物以妄為常貪者徇財烈者徇名
忿則如山慾則如澤極沈淪而愈降恣飄蕩以忘歸因根接
塵隨境生解為寒冰為湯火皆其一念之差為鬼域為豺狼
遂入萬殊之變原其名數何可歷陳我是以廣太上之好生推
妙嚴之濟衆酌黃華於東井蕩爾形骸耀丹治於南宮陶其

靈質宿業不存於故想化機更造於新成不溺不焦爾可以見本真之不昧能流能焰爾可以驗道氣之常行承茲三景之開明即詣諸天而受度更無退轉並樂超升

門帖

正三門

華蓋北瞻天帝座蓬萊東擁道家山

啟元殿

咫尺天光開玉府萬重道氣見金容

正薦位

雙鳳駕雲開輦路
羣龍環日護天香

總真殿

春當霄漢三台貴
明步星辰四輔尊

萬法宗壇門

綠章封奏通三景
絳節趨朝引萬神

殿後西門

玉殿受釐春意滿
竹宮拜貺景星明

北斗殿

慶雲郁穆承天闕景緯昭回共斗樞

殿後東門

仙音縹緲鸞凰合神衛森嚴虎豹閑

景曜殿

三光合景扶元氣五緯齊明報德星

寥陽殿

五文結篆間天極九氣生神象帝先

朱陵府

九華曲蓋迎司命七寶芳林主好生

齋厨

金鼎蟠龍甘露溢玉芝成象大庖盈

齋堂

報聞千歲蟠桃熟約取九霄飛佩來

茭郭

莫就此間存活計便教向上得光明

祭風伯文

維風有神在巽之位地附天而不墜持舉於中陽旋陰而時行扶搖直上今則至尊有禱上帝來臨伏願宣靈氣於八門穹祇翕合卻飛塵於九地宇宙廓清

祭雨師文

恭承帝命祇祀雨師出雲氣於山川彌綸瓊闕濯天章於河漢飛洒玉都今則輦起玄壇導迎法駕伏願六龍調馭順和協於陰陽萬物潤滋肅澄清於天地

長春宮祈福保安齋意

上天眷佑長貽宗社之隆至道冲盈式衍邦家之福屬
偶嬰於疾疚爰謹事於禱祈伏願聖鑒昭回祥光旁燭
身逢康泰暨中壺以平安運協壽昌與多方而寧謐

青詞

治平之運仰荷洪庥疾疚之生敢忘忱禱爰命羽衣之
士敬敷寶笈之科伏願五帝儲華三光協德身康疆而
逢吉有永壽祺國清淨以無為均蒙福惠

崇真宮祈福保安齋意

丕承付託仰資天地之和祇有啓居偶感陰陽之沴喜
遘臻於康復爰謹致於禱祈伏願輯福上躬錫禧中壺
前星炳煥協家國之尊安景貺熙明及臣民而定壹神
明垂祐丕顯隆平福履愆和偶嬰疾疢敬祠琳宇備歲
琅科伏願景貺來臻壽祺永錫康強逢吉永承宗社之
安化育成功長保乾坤之造

祭海神文

潮失故道犯我鹽官有司捍防民力既殫閱歷歲時靡
濟茲害浙郡多下恐就淪敗民實何辜不德在予相臣
來言交修用孚乃勅中外悉智展力相爾有臣亦克受
職我土既固民生底安六府治修報祀萬年

祭伍子胥文

爾以忠隕主潮于吳潮今為灾吳其治乎爾其揚靈具
訓海若俾安其常毋作民虐既止既安民遂有生爾作
明神永有令名

大龍翔集慶寺正殿小上梁文

伏以龍光有赫象教方興式嚴前殿之崇祇奉祇園之勝上棟下宇方締構於良工細桷大宗並具材於楨榦成規斯在願力維弘伏願天相聖心佛加神運百重闌楯移來天上之慈雲萬歲山河永鎮人間之福地

吾殿小上梁文

兜率化宮移來地上梵天新刹示現人間坐延衆佛之臨殿有四阿之制鉤心鬬角先崇締構之宜審面飭材

已具經營之素式觀地架儼若天成伏願龍象翊扶鳳
皇翔繞丹青金碧赫然佛日之輝黼黻文章永著皇風
之盛

大龍翔集慶寺正殿上梁文

伏以虎踞龍蟠即淵潛之佳地雲興霧湧建梵釋之新
宮巍巍中正之居赫赫大雄之座欽惟欽天統聖至德
誠功大文孝皇帝惟天為大如日之升經綸既正於洪
規崇信不忘於願力美矣善矣大成舜帝之箭韶經之

營之匪為文王之臺沼我佛有護國救民之助吾皇示
報功崇德之心黃金滿布於祇園華構上移於兜率式
崇大殿爰舉修梁相我工人陳茲善頌

拋梁東

日上扶桑散曙紅
鹿苑珠璣涵曉露
鐘山草木動春風

拋梁西

石城突兀護江堤
舊遊曾見羣龍舞
望幸猶聞六馬嘶

拋梁南

蒼龍曾此卧江潭
風雲會合千峰一

山谷傳呼萬歲三

拋梁北

瞻望帝星臨萬國山川誰為地東南

形勢只如天咫尺

拋梁上

白玉毫光千萬丈吾皇還似覺皇尊

龍象人天皆拱向

拋梁下

亦有憐憫千萬厦彌天法雨本無私

滿月明珠寧有價

伏願上梁之後皇基鞏固紺宇尊高紀億萬年共祝聖

神之壽遍大千界同沾殊妙之恩萬歲萬歲萬萬歲

吾殿上梁文

伏以浴日九淵現禎符於鐘阜承天八柱建名剎於冶城爰開方廣之筵用祝周阿之殿欽惟欽天統聖至德誠功大文孝皇帝清明有鑠故舊不遺鷺起星河萬斛綵舟之容與鳳歸天闕七重寶樹之檀欒凡轍跡之所臨宜珠光之共護修梁肇舉善頌斯陳

拋梁東

萬丈紅光接寶宮古佛昔來龍繞座

高僧時謁錫飛空

拋梁西

長安日近碧雲齊但依貝闕瞻龍象
即是鸞輿慰耄倪

拋梁南

千年王氣現優曇浴龍池水皆功德
擁日山峰盡翠嵐

拋梁北

上意每憐江樹碧紺宮留鎮國南門
華蓋瞻依天北極

拋梁上

紫蓋紅雲春蕩漾舉頭見日庶民心

思佛思君同一想

拋梁下

慈雲恩雨均沾灑三年以至萬斯年

長樂昇平承福嘏

伏願上梁之後皇風遠播佛日同輝四宇八荒總被覺
慈之化億靈萬載永歌帝力之加萬歲萬歲萬萬歲

道園學古錄卷二十六